

Zuɲɲwire á wakita na a puwatertaa Paul ge emnde a TAISALAUNIKI

Ga use á Paul

¹ Wakita na yá aɲkwa puwaná ba iya Paul, ɲá antara Silwanus, ira Timaute. Ná puwakurte ge kure emnde á Dadaamiya, antara Yaakadada Yaisu *Almasiihu na kwá am larde á Taisalauniki na: Eddemiya Dadaamiya á magakuránmaga ɲgurna, á vakurteva hairire.

Njá á emnde a Taisalauniki am fetarfire-aatare

² ɲere, ɲá aɲkwa slafaná we á ɲere ba kelaazare ge Dadaamiya adaba kure bademme. Ba kelaa má ɲá aɲkwa maga maduwa á ɲere ádeza Dadaamiya, ɲá aɲkwa yehakuryeha kure keni am huɗe-aara. ³ Am maduwa á ɲere ɲanna, ɲá aɲkwa yeha názu kwá aɲkwa maganá kure adaba fetarfire á kure áte Yaisu *Almasiihu, antara wáva á kure ge mága hayavire adaba zhera-aara, ira tama yaikke na kwá aɲkwa maganá kure áte Yaakadada á miya Yaisu Almasiihu na bademme. ⁴ Egdzar mama-aha-aaruwa, ɲere ɲá aɲkwa slafaná we á ɲere ge Dadaamiya adaba kure na wá, adaba ɲa dise á ba an diye geni a wayakurtaa ɲane, a dzerakursaa ɲane ge kwa emnde-aarire. ⁵ Am sarte na ɲa balakuraa labare á higa, elva a Yaisu

Almasiihu na wá, banerakuranka á ba áte we ba estuwa, amá ndza ña bakurnaa an hakuma á Shedekwe Cudedde. Nere diyanerdiya geni bademme á názu ñá bakurná ñere ñanna ba jire. Ba kure keni diyakurdiya geni názu ndza ña maganaa ñere ázekure na, ña wayakurante ba shagerire. ⁶ Ekkure wá, d'abakurtedfaba sera á ñere, d'abakurtedfaba náza á Yaakadada keni. Adaba shakurushe zladá kwakya adaba elva á Dadaamiya, aley kwá á ba an higa á kure argena, kwá an higa na á vakurtá Shedekwe Cudedde na.

⁷ Daaci, an una ñanna wá, kwá an'kwa á maraterá garava shagera ge emnde á Dadaamiya na tá am larde á Makiduniya, an larde á Akaya na bademme. ⁸ Adaba barka á kure, elva á Yaakadada hyemhye am slede bademme am Makiduniya antara Akaya. Ma áme keni emnde tá cena ba labare á fetarfire á kure áte Dadaamiya, una ñanna ma ndahanerka ñere keni ba kalle. ⁹ Tá an'kwa ndahaná ba emnde an ire-aatare, geni ndza kwa lyanervaahe, kwa ñañerñaa á ba an jirire am sarte na ñá am mba á kure. Zlabe tá an'kwa á ndaha geni kwa eptsannaa iga ba d'ekid'eki ge hele, kwa sem sera á Dadaamiya á jirire, kwa an'kwa á maganá slera ba ge ñane na ni an shifa na. ¹⁰ Ira paka na ni kwá an'kwa pakaná kure Egdza-aara na ni watse á eptsá á sawa am samaya na. Egdza-aara ñanna wá, ba Yaisu na ndza a tsantaa ñane am faya, watse á de lyamiya am lámare na á de shá emnde na. Lámare ñanna watse á de magava am sarte na ni má jaaja ervaunde Dadaamiya am halavuwa á duniya na.

2

Paul ndza a magán estuwa slera á Dadaamiya am Taisalauniki

¹ Egdzar mama-aha-aaruwa, ba kure an ire á kure keni, diyakurdiya geni duwa á ñere ádezekure na gavka dey. ² Diyakurdiya geni ba lauktu ñá dáada ádezekure keni, ndza ta zla-zlanjerse emtsaade, magarañeránmaga palase kwakya am Filipi. Danjeremde ázekure keni, ña de beraa ba kelaade-aha zlañe ádalije kwakya, aley Dadaamiya a fañerem ndzedá keni kwakya am vuwa, geni ñá ñalakurseñale labare á higa na a sawa ázeñara na. ³ Waazu na ñá magaterá ñere ge emnde na wá, gevka elva á fida, ñaaka elva á danñwire am huñe-aara, ma zlerma keni ñaaka am huñe-aara ñekideki. ⁴ Ñere wá, ñá ñala ba názena á kataná Dadaamiya, añaaba zuññwe a habazesaa ñane názu am ervaunñe á ñere, lauktu a fañerar de ñalatera labare á higa ñanna ge emnde. Estuwa ñere keni ñá ñalá ba názena á kataná Dadaamiya arge názu tá kataná ba emnde. Añaaba ñane wá, ñiyaadiya ervaunñe á ñere. ⁵ Ba kure keni diyakurdiya ganakini ñañerakuranka elva-aha na emtakemtake áte we ge badakurbada an ñane, bi elva a kátá duksa. Una Dadaamiya ñiyaadiya ñirire-aara bañemme. ⁶ Emtu kwá kurken ndza ñá kátá yaikkire ázekure emtu? Una estuweka, katanerka ñere yaikkire ma ázekure, ma áza emnde-ara keni ñekideki. ⁷ Má áte ñirire wá, ma andze ñá naba marakuranmárá hakuma á ñere ge kure, añaaba ñere ña emnde á ñela á

Yaisu *Almasiihu. Amá slaslanerka n̄ere una n̄anna d̄ekid̄eki, baira am sarte na n̄á ázekure na, ndza n̄a marakuraa ba tsekad̄d̄ire ba seke n̄já á tara mama antara egdzara-aara. ⁸ Ad̄aba n̄a wayakuraa n̄ere an ervaun̄de á n̄ere palle na wá, ba shifa á n̄ere keni ndza wayan̄erwaya n̄á yainya ad̄aba kure. Á tsaaka á ba an labare á higa na a sawa áza Dadaamiya, n̄a de balakursaa n̄ere na, amá ndza n̄a wayakurte ba seke shifa á n̄ere. ⁹ Egdzar mama-aha-aaruwa, ábi ba kure keni zlafe viyakurarka zlad̄a á slera na ndza n̄a shanaa n̄ere am dagave á kure am sarte na ndza n̄a de balakuraa labare á higa na? Vayi vacika ndza n̄á maga ba slera geni n̄á shansha ba názu n̄á zanuze ge we á n̄ere keni, geni a gan̄erefka gwatama arge kure.

¹⁰ Emtsaad̄e wá, kure kwá diya ba n̄jiinja ge seyde-aha á n̄ere, Dadaamiya keni diyaadiya bad̄emme geni ndza shagera zlaláva á n̄ere am dagave á kure, ndza baaka duksa mándzawe na n̄a maganaa n̄ere, ndza emtake n̄já á n̄ere áte kure bad̄emme. ¹¹ Ekkure bad̄emme diyakurdiya geni ma am uwe keni ndza n̄a magakurán ba seke una ni á maganá dada áte egdzara-aara, ¹² ndza n̄á vakurte sawari-aha gergere, n̄á ekhyakurá ervaun̄de, ba kelaazare ndza n̄á bakurá ba magaumága názu á kataná Dadaamiya, a d̄ahakur ge de n̄ja antara n̄ane am zlanna-aara, am sleksire-aara na an daradza jipu, wulwule jipu na.

¹³ Duksa palle zlafe ad̄aliye wá, n̄á yainka slafana we ge Dadaamiya ad̄aba n̄ane: Am sarte

na ndza ɲa de balakuraa elva á Dadaamiya, zharakurka seke elva á ura, amá kwa cenvaahe, kwa lyevaahe an ervaunđe á kure palle geni elva á Dadaamiya ba jirire. Ba jire á kure una Dadaamiya ba jirire. A eptsantaa ba ɲane zlalava á kure kwa emnde na fakurtarfe na. ¹⁴ Egdzar mama-aha-aaruwa, iyau kure keni shakursha názu ndza a shaa emnde á Dadaamiya na tá yeka an zhera á Yaisu *Almasiihu am Yahudiya na: Adaba tá aɲkwa shakuruwa ba emnde a larde á kure zladá seke una ndza ta shateruwa Yahudiya-aha zladá ge emnde-aatare na ta fetaare áte Yaisu Almasiihu na. ¹⁵ Degiya ba Yahudiya-aha ɲanna una ndza ta jaa Yaakadada Yaisu ba seke una ndza ta cebaa nabi-aha werre na. Kina keni tá aɲkwa maganjerá palase ge ɲere ma áme keni bademme. Itare wá, garevge ba seke kelaade-aha á emnde bademme, tá maga ba názu wayaaka ervaunđe á Dadaamiya dekiɲeki na. ¹⁶ Adaba ta ettapa bademme ge piyanerte de balatera elva á Dadaamiya ge emnde a jeba umele. Itare keni wayarka geni emnde umele tá lyelye shifa-aatare áza Dadaamiya. Kina wá, haypa-aha-aatare ɲanna jauje ge ndzedá, nahetenaha am ervaunđe á Dadaamiya mazla-aara, tá de ɲezleka am shairiya á Dadaamiya dekiɲeki.

Paul á kátá ba á de tsateraretse zlaɲe ádaliye ge emnde á Taisalauniki

¹⁷ Egdzar mama-aha-aaruwa, degi ba kwaye vaci tegava á miya antara kure na, ɲere ekhyaaka ervaunđe á ɲere dekiɲeki, ire á ɲere á ba ázekure. Baaka pute na maganjerka

ɲere geni a shanɲeransha de tsakurartse na. ¹⁸ Ge eptsa ádezekure na wá, ɲere ndza wayanɲerwáyá jipu. Iya Paul wá, ndza ya tapán ser palle-ka geni a shanansha eptsa ádezekure na, amá baɲemme una ɲanna ndza a piyetaa ba Shaitaine. ¹⁹ Ge jirire wá, kure keni gakurevge duksa palle ázeɲere ge melanɲeru ge fa tama á ɲere áte Dadaamiya am duksa baɲemme, gakurevge dalila á higa á ɲere; zlaɓe ádalije gakurevge dalila á geɲa á ɲere má de samsa Yaisu *Almasiihu. ²⁰ Una ba estuwa, ɲá de gedetegeɲa aɲaba kure, ɲá de higa á ba áte kure.

3

¹ Am haraare cenanɲeránka labare á kure ɲekideki, dzegwanɲeránka ɲere farvaunɲe mazla-aara. Daaci ɲa naba njante, a ba ɲere: Ambane ɲá bela Timaute ádezekure, ɲere ɲá njinja emtsaɲe an ire á ɲere am Ataina. ² Timaute na ɲa belanaa ɲere á dezekure na wá, ɲane egdza emmemiya na ɲá anɲkwa maganá slera ge Dadaamiya átirpalle ge balatera labare á higa, elva a Yaisu Almasiihu ge emnde. ɲa belanaa ɲere ge de fakurem ndzeɲa am vuwa, geni kwa fetarfe ba shagera áte Yaisu Almasiihu. ³ Ma ware á kure keni a gazleka aɲaba zlaɲa na kwá anɲkwa ɓashaná kure na. Má ba zlaɲa wá, ba kure keni diyakurdiya una gevge duksa palle am názu a famiyaare Dadaamiya ge miya emnde a fetarfe. ⁴ Am sarte na ɲa ázekure keni, ndza ɲa ndakurnda baɲemme ge kure, geni miya wá, ma vaatara keni watse mí ɲezleka am zlaɲa. ɲane una a shaa kure am iga á ɲere

na, amá kure diyakurdiya jirire-aara bademme. ⁵ Adaba una nanna dzegwanánka farvaunđe mazla-aara, ya naba bela Timaute ádezekure, geni á de cenañervacena nane má degdege fetarfire á kure. Adaba yá an lyawa jipu geni bi shakurtushe Shaitaine, daaci slera á njeve gevge ba dey.

⁶ Amá kina wá, saasa Timaute ásezeñere, a sañeraa labare emtakemtake á sawa ázekure, a bañerantsa nane: Farfe fetarfire á kure, farfe háyávire am dagave á kure. A ba nane zlaɓe ádaliye: Shagera ervaunđe á kure áte njeve, kure keni kwá kumá ba kwa nañerhe an ice, seke una ni njeve keni njá kumá ba puwete ice áte kure na. ⁷ Egdzar mama-aha-aaruwa, nja ba palase, antara zlaɓa na njá naana njeve na, aley am sarte na saasa Timaute ásezeñere, bademme saasa higa á njeve adaba labare á fetarfire á kure na na cenáncena farfe na. ⁸ Daaci kina wá, saasa shifa am njeve mazla-aara, adaba diyañerdiya geni tsakuraatse degdege, emtake njá á kure an Yaakadada. ⁹ Adaba na shaa higa kwakya áte kure á katafke á Dadaamiya na wá, ma njá slafaná ba ser wanyara we ge Dadaamiya keni, una á hyefka ba názara keni. ¹⁰ Vayi vacika njá njala ba Dadaamiya geni á melañerumele njá daada á de zharakurzhará, we á njeve una, we á kure una, ge kwarakurse názuru zlaɓe kwá an wedere-aara ge far ge fetarfire á kure na.

¹¹ Daaci sey tá de vañertá ba tara Eddemiya Dadaamiya, tá an Yaakadada á miya Yaisu barama a de zharakurzhará na. ¹² A fakurarefe

Yaakadada ge háyáva á kure, geni kwá wayaave-waye am dagave á kure, kwá waya emnde bademme, ba seke una ni njá anjwa wayakurá nje na. ¹³ Yaakadada á de vakurtá ba estuwa ndzedá, geni kwá de gevge emnde na shagera ervaunđe-aatare, baaka duksa mándzawe am itare, vacite na má de samsa Yaakadada á miya Yaisu an emnde-aara. Daaci kwá de gevge emnde cufedde á ba an jirire áza Dadaamiya.

4

Zlalava shagera na á kataná Dadaamiya

¹ Náwa elva na njá zlaná átekwa na: Ekkure wá, kwaranjerakursekwáre bademme geni tá njá estara emnde á fetarfe áte una á kataná Dadaamiya na. Diyanjerdiya tsa ganakini kwá maganá á ba áte una njanna, amá njá anjwa á njalakurnjála zlađe adaliye an zhera á Yaakadada Yaisu, fawarfe zlađe adaliye á de katafke á de katafke. ² Náwa názu ndza a kwaranersaa Yaakadada Yaisu ge nje. Nje keni njá kwarakursaa á ba an ndzedá-aara diyakurdiya bademme. ³ Názu á kataná Dadaamiya ázekure wá, á kátá kwá gevge emnde cufedde á ba an jirire, kwá tsufa ire á kure ba krette ge mága gwardzire. ⁴ Ma ware edda una á ba an mukse am kure na, sey a mbesembe njá mukse-aara áte una á kataná Dadaamiya, emnde tá de zleba ba itare na. ⁵ Wáyáva á kure áte itare a gevka ádfaba ndzedá á mbagrire seke una ni tá anjwa maganá emnde na dfabarka Dadaamiya na. ⁶ Ma ware á kure keni a maganá nka kelaadire an gwardzire

dekideki ge sleriya-aara. Zlermauka sleriya á kure dekiideki. Baira ge kure, ñá fantau vatene-ka ge bakuránba-aara, ndza fanerakuremfe am vuwa, geni Yaakadada Yaisu á de fateraare shairiya ge jeba á emnde a mága kelaadire ñanna. ⁷ Dadaamiya ðamiteka ge bamiya magaumága gwardzire, amá a ðamite ge gev emnde-aara, ge nja am cufedðire. ⁸ Kwáye ñane elva ñanna; má edda-aara cenaaka, a kwalare ge uraka, a kwalare ba ge Dadaamiya na a vakurte Shedekwe Cufedðe na.

⁹ Egdzar mama-aha-aaruwa, áte elva a háyáva á egdza mamire am dagave á kure emnde a fetarfe wá, ma banerakuránka elva ñanna mázla-aara keni ba kalle. Adaba ba kure an ire á kure keni cenakurancena názu a kwarakursaa Dadaamiya ge mága háyávire. ¹⁰ Ba kina keni má ba háyávire wá, a'aa kure kwá áñkwa emmága áte emnde a fetarfe na tá am lárde á Makiduniya na baðemme. Aley keni ñere ñá bakurá ba magaumága zlaðe áðaliye á de katafke. ¹¹ Iyau, ba seke una ndza ya ndakurnda na wá, magauka gaagusa dekiideki ge tátaya nja áte ye palle, dawmbareka á dem elva á emnde. Ma ware á kure keni a emmága ba mbera-aara. ¹² Daaci má kure gakurevge estuwa wá, ba emnde na zlaðe fartarka áte Yaisu *Almasiihu na keni, watse tá fa zherwe áte kure, kure keni kwá de weshateranteka ire ge emnde, kwá de ñaleka duksa áze itare.

Vaci eptsa á Yaakadada á sa am samaya

¹³ Egdzar mama-aha-aaruwa, náwa názu ñá bakurná ñere áte emnde na zlauzle shifa-aatare

am duniya na; geni kure keni njauka an dzámá ire seke emnde na baaka táma-aatare ge sha shifa umele am iga á emtsa na. ¹⁴ Miya wá, famitarfe geni ndza emtsamtsa Yaisu, amá tsettse am fáyá. Estuwa, mí naba fetarfe zlahe ádaliye geni emnde na tá emtsa am fetarfire na wá, Dadaamiya keni á de tsatertetse geni tá de njá antara Yaisu.

¹⁵ Náwa elva na ndza ña shanaa ñere áza Yaakadada, a ba ñane wá: Vaci eptsaaara á sawa am samaya ñanna wá, watse mí desá mi-ka zunñwe arge emnde na emtsaremtsa na, á bina. ¹⁶ Vacite ñanna wá, Dadaamiya á de ndasendahe elva-aara á ba an ká kwára. Male á malika-aha keni á de keta kwara, a ndahese náza-aara. Derkwákwá á Dadaamiya keni tá de fertanteferta, lauktu á de tsekwa Yaakadada á sawa am samaya. Am iga á una ñanna maa, tá de tsettse emnde a fetarfe na ndza matsarmatsa werre na am fáyá, ¹⁷ lauktu á de dámida Dadaamiya átirpalle antara miya emnde na watse má an shifa na bademmire á miya á dem kumba, mí de ja ire an Yaakadada am zhegela. Kwaye ñane njá á miya na ni watse mí de njá estuwa áza Yaakadada dem ba ge ñekideki. ¹⁸ Kwa cenáncenka-he una bademme? Ekhyawakhya ervaunñde á kure an elva ñanna ma vaatara keni am dagave á kure.

5

Ma vaatara keni njawinja am niya á kure ge ufa Yaakadada

¹ Egdzar mama-aha-aaruwa, áte sarte na á de sawa duksa-aha ɲanna átekwa na maa, kure, ma banerakuranka mazla-aara keni ba kalle.

² Adaba kure keni diyakurdiya bademme, geni vacite na Yaakadada á de eptsa á sawa na wá, watse ba bresse ba estuwa ba seke sawa á neyle.

³ Á ba am sarte na tá de banba emnde: Kina wá, anƙwa hairire na, keɗa-aatare ba ge deƙideki na keni á de tsekwateraare á ba am sarte ɲanna, am bressire ba estuwa seke má á tsekwaara yá egdzere ge mukse á huɗe. Vacite ɲanna wá, watse baaka ɲezla-aatare deƙideki.

⁴ Egdzar mama-aha-aaruwa kure wá, gakurevka ba seke emnde na tá am tabeɗammire na, geni á se shakursha sarte ɲanna am bressire ba estuwa. ⁵ Bademmire á kure, kwa ba seke emnde na tá zlála am parakkire á vaciya na. Miya emnde a fetarfe wá, bademmire á miya gamiyevka ba seke emnde na ni tá zlála am tabeɗammire á vaciya na.

⁶ Adaba una ɲanna wá, paumika hare, njawamika ba seke emnde umele, weshawamiyanteka enƙale á miya an duksa umele deƙideki. ⁷ Njá ba nja keni ábi tá paná ba emnde na tá am vaciya na hare. Am larde-aha á miya, enƙale am ire á emnde tá weshante á ba an vaciya ɲanna. ⁸ Amá miya wá, samiyesse am vayiyire, gamiyevge emnde a zlala am parakkire á vaciya. Adaba una ɲanna, njawaminja an enƙale á miya, fawamitarfe áte Yaisu *Almasihu, magawamimaga háyáviire. Duksa-aha ɲanna gevge ba seke kebebbe á miya ge tsufa vuwa á miya. Zlabe ádaliye:

faumifa táma ba shagera áte vacite na watse á de ñezlamiseñezle Dadaamiya ba ge ñfekideki na. Táma ñanna keni gevge ba seke tunjur ge tsufa ire á miya. ⁹ Njauminja ba estuwa, adaba Dadaamiya dzeramiseka ge za miya an shairiya má de jaaja ervaunđe, amá a dzeramise geni á ñezlamiseñezle á kya erva an Yaakadada á miya Yaisu Almasiihu. ¹⁰ Yaisu Almasiihu wá, ndza a emtsaa adaba miya. Ndza a emtsaa adaba miya geni watse mí de njá kerđe antara ñane. Una ma emtsamimetsa, ma watse má á ba an shifa á miya emtsaade keni, watse mí de njá kerđe má eptsaptsa á sawa. ¹¹ Kwa cenanceneka-he una bademme? Ma ware á kure keni a fanemfe ndzedá am vuwa ge ura umele an ñane, melawanumele ge ire á kure ma vaatara keni, áte una kwá ankwá maganá kure kina na.

Názu á kwaratersá Paul am halavuwa á elva-aara

¹² Egdzar mama-aha-aaruwa, ñá ankwá á ñalakurnjála: taslawá á kure, faufa zherwe áte emnde na a dzeratersaa Yaakadada ge maganaa slera-aara am dagave á kure na, a dzeraterse ge fakuru hyema antara tá kwarakurse elva-aara na. ¹³ Faufa zherwe áte itare, marawateránmara háyáva á kure adaba slera na tá maganá itare am dagave á kure na. Iyau, njawinja áte emtakire am dagave á kure kwa emnde a fetarfe bademme.

¹⁴ Njá ankwá á ñalakurnjála zlađe adaliye egdzar mama-aha-aaruwa, taslawá á kure, valawatararvale ge emnde a mága masefire

na tá am dagave á kure; fawateremfe ndzedá am vuwa ge emnde na tá shekwaaka gázla na; melawaterumele ge emnde na baaka paydá-aatare; fawaterfe ervaunde ge emnde bademme. ¹⁵ Ekkure wá, faufa hyema ba shagera, eptsawannaaka emtaŋkire ge ura an emtaŋkire. Arge una ŋanna wá, ma vaatara keni wavauwáva ba shagera ge mága maggwire am dagave á kure, magaumága una ŋanna áte emnde bademme.

¹⁶ Ma vaatara keni njawinja á ba an higa á kure. ¹⁷ Magaumága maduwa, icawanseka dekideki. ¹⁸ Ma a shakur vaatara duksa keni, bawanánba ususe ge Dadaamiya, una ma emtakire, ma emtaŋkire keni. Una duksa na á kataná Dadaamiya ázekure emnde na gakurevge palle antara Yaisu *Almasiihu na.

¹⁹ Piyawanteka dekideki ge Shedekwe Cudedde slera-aara. ²⁰ Estuwa, má ura á ndahá nabiyyire keni, epsawanaaka elva-aara. ²¹ Ma uwe keni lawanaale emtsaade ba shagera, lauktu kwá ŋanaaŋa una shagera am huđe-aara. ²² Bademme á názu átuge shagerkire na, kure sawansese ire á kure am huđe-aara.

²³ Dadaamiya na edda á vamita hairire na, a gakurvege ba ŋane zlaŋe adaliye emnde cudedde bademme, am eŋkale á kure, am shifa á kure, ira vuwa á kure bademme. Daaci á de jerka duksa mándzawe am kure dekideki vaci eptsá á Yaakadada Yaisu *Almasiihu. ²⁴ Dadaamiya na a dzerakursaa ŋane ge gakurve emnde-aara na wá, ŋane á eptseka elva-aara dekideki, á de gakuranvege ba ŋane una

ɲanna.

²⁵ Ɗa baa ba kure egdzar mama-aha-aaruwa: magaumága maduwa arge ɲere keni.

²⁶ Gauga use-aha á ɲere ba shagera am dagave á kure emnde a fetarfe. ²⁷ Yá magakurá ba tasle, an zhera á Yaakadada, ndaundaha wakita na á katafke á emnde a fetarfe bademme.

²⁸ Ɗgurna na á magaterá Yaakadada á miya Yaisu Almasiihu ge emnde na, a hyetehye áte kure bademme.

Wakita á Dadaamiya
La Bible en wandala

copyright © 1999 Wycliffe Bible Translators, Inc.

Language: (Wandala)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 21 Feb 2024 from source
files dated 29 Jan 2022

dec75dd5-4784-5059-aa00-668d508a6b0d